

SECHABA SA HESO, KEA LE LUMELISA,

RE BOETSE RE FIHLILE NAKONG EA MAFELO A SELEMO MME RE MOTHATING OO RE TLA QALA SELEMO SE SECHA.

KA HONA, KE LE MEMA HO KHEFUTSA METSOTSOANA E SE MEKAE HO ITEBOHELA HA ELE MONA MORENA MOLIMO A RE PEPILE LE HO RE TATAISA KA MOHAU LE KA LERATO HO FIHLELA MONA.

KE LE MEMA HAPE HORE RE HOPOLENG, KA HLOMPHO, BARATUOA BOHLE BA RONA BAO 'MOPI A SENG A BA BILELITSE HO EENA HO TLOHA LEFATS'ENG LE KA KOANO SELEMONG SENA SE FELANG.

RE BA KOPELA HORE MEEA EA BONA E PHOMOLE KA KHOTSO MOHAUNG OA MORENA.

JOALO KA TLOAELO, NAKO ENA EA MAFELO A SELEMO LE HO THOASA HOA SE SECHA E RE FA MONYETLA OA HO HETLA MORAO RE HLAHLOBE TSELA EO RE E TSAMAILENG, 'ME JOALE RE INAHANELE HORE NA SELEMONG SENA SE SECHA RE LAKATSA HO TSAMAEA TSELA E JOANG.

BASOTHO BA HESO,

.
NTUMELLENG KE LE HOPOTSE TSELA EO RE E TSAMAILENG SELEMONG SENA SE FELANG, RE LE SECHABA SA BASOTHO.

.
KEA KHOLOA LE TLA LUMELLANA LE 'NA HORE E BILE TSELA E SENG BONOLO.

.
KE SELEMONG SONA SENA SE FELANG MOO RE ILENG RA TLAMEHA HO EA LIKHETHONG TSE AKARETSANG TSA TS'OHANYETSO KAMOR'A HORE NTLO EA BAKHETHOA E FETISE TS'ISINYO EA HO HLOKA TS'EPO 'MUSONG OA BOBELI OA KOPANELO (**SECOND COALITION GOVERNMENT**) O NENG O ILE OA KENA LITULONG KA SELEMO SA LIKETE TSE PELI, LESHOME LE METSO E MEHLANO (**2015**).

.
BOHLE REA TSEBA HORE LIKHETHO TSEO TSA TS'OHANYETSO LI BOETSE LI RE TSOALETSE 'MUSO OA KOPANELO OA BORARO PALENG EA NAHA EA LESOTHO.

.
LEHA LITABA TSENA LI KA SUPA HORE METSO EA PUSO EA SECHABA KA SECHABA E NTSE E TEBA, HAHOLO KA LEBAKA LA HORE LIKHETHO TSENA LE TSONA LI PAKILOE KE BALEBELLI BA MACHABA E LE TSE LOKOLOHILENG TSE NANG LE PONALETSO, EMPA TABA E TS'OENYANG KAROLO E KHOLO EA SECHABA KE

MAKHETLO ANA A MANGATA AO NAHA EA RONA E EANG LIKHETHONG TSE AKARETSANG KA ONA.

HO TLOHA KA SELEMO SA 2012, HA RE EBA LE 'MUSO OA PELE OA KOPANELO, RE TS'OERE LIKHETHO TSA NAHA MAKHETLO A MARARO KA HARE HO NAKO EA LILEMO TSE HLANO.

REA TSEBA HORE LIKHETHO LI TSAMAEA LE LITS'ENYEHELO TSE BOIMA KA HOO SENA SE BOLELA HORE MESEBETSI E MENG EA SECHABA E SITILOE HO ETSOA KA HA LICHELETE, EKASITA LE NAKO, E ILE EA LEBISOA HO TS'OAROENG HA LIKHETHO.

KA BOMALIMABE, SEBOPEHO SENA SE HLAHISA NAHA EA RONA E HLOKA BOTSITSO.

KA HONA KE TS'EPO EA KA HORE PARAMENTENG ENA EA LESHOME, RE TLA LEKA KA MATLA HORE PUSO E TSITSE, HOBANE KE TLAS'A PUSO E TSITSITSENG MOO RE KA TSEBANG HO LOANTS'A, KA KATLEHO, MATHATA A MAHOLO A IMETSENG SECHABA SA BASOTHO E LENG TLALA, BOFUMA LE TLHOKAHALO EA MESEBETSI.

HA RE HOPOLENG HAPE HORE KE SELEMONG SENA SE FELANG HA RE NE RE QALA MOTHAMO OA BOBELI OA BOIPUSO BA LILEMO TSE MASHOME A MAHLANO KAMOR'A HO KETEKELA LILEMO TSE MASHOME A MAHLANO A BOIPUSO NGOAHOLA.

NAKONG ENA EA MOKHAHLELO OA BOBELI OA LILEMO TSE MASHOME A MAHLANO TSA BOIPUSO, RE HLOKA HO SEBETSA KA MATLA LE KA BOITELO HO QAOLLA LESOTHO BOFUMENG BONA BO HATELLETSENG SECHABA SA HABO RONA.

BASOTHO BA HESO,

RE SE RE HLOKOMETSE, EKASITA LE HO ELETSOA HORE HA E-BA RE BATLA HO TIISA LE HO TEBISA METSO EA PUSO, RE HLOKA HO HLOPHA BOCHA LITS'IEA TSA BOHLOKOA TSA PUSO.

LITS'IEA TSENA LI KENYELETSA MOLAO OA MOTHEO, MAKHOTLA A KABO EA TOKA, MAFAPHA A TS'IRELETSO, LE BOSEBELETSI BA SECHABA.

KEA ELELLOA HORE 'MUSO O IKEMISELITSE HO NTS'ETSAPELE TLHOPHO-BOCHA ENA KA SEKHAHLA LE KA POTLAKO.

KE BOETSE KE IPILETSA HO BOETAPELE BOOHLE BA SECHABA, LE MAFAPHA OHLE A SONA SECHABA HO BONA HORE MOSEBETSI ONA OA BOHLOKOAHALI O ETSOA KA TIEO EOHLE, LE HO BONA HORE O HAPELLA MAIKUTLO A SECHABA KA

KAKARETSO, KA SEPHEO SA HO TLISETSA NAHA ENA EA HABO RONA BOTSITSO LE KHOTSO EA MOSHOELELLA.

BO MME LE BO NTATE,

E 'NGOE QHOLOTSO EO RE NTSENG RE TOBANE LE EONA RE LE NAHA EA LESOTHO, HAMMOHO LE LINAHA TSE LING TSA LEFATS'E, KE PHETO-PHETOHO EA BOEMO BA LEHOMO (**CLIMATE CHANGE**).

KA THOKO HO LIPULA TSE SENG LI HANA HO NA KA NAKO EO RE NENG RE E TLOAETSE LILEMONG TSE FETILENG, JOALE SELEMONG SENA RE BONE MOHLOLO OA LEHLOA LE KHETHEHANG KA KHOELI EA PULUNGOANA.

RE ILE RA UTLOA KA MASOABI HA LETONA LA TEMO LE KANETSO EA LIJO LE TEKA TLALEHO KA NTLONG EA BAKHETHOA E NENG E SUPA TAHLEHELO E KHOLO EA LIHOAI, HAHOLO-HOLO HO LIHOAI TSA LIKHUTS'OANE, E TLISITSOENG KE MAEMO ANA A RE MAKALITSENG BOHLE.

MAEMO ANA A HLOBAETSANG A AMA TEMO LE TLHAHISO EA LIJO KA KOTLOLOHO.

KA HONA, RE HLOKA HO FUOA MALEBELA KE LITSEBI E LE HO RE THUSA HO LEMA KA MOKHOA O MOCHA O TLA TSOELAPELE HO RE TLISETSA KOTULO E KHOTSOFATSANG.

LEHA MAEMO E LE ANA, RE LE LIHOAI, RE KE KE RA LAHLA TS'EPO E BE RE PHUTHA MATSOHO.

KE BOIKARABELLO BA RONA HO HLAISA LIJO, MOLEMONG OA MALAPA A RONA, LE SECHABA KA KAKARETSO, HOBANE REA TSEBA HORE **"MPHE-MPHE E'A LAPISA MOLEKANE, MOTHO O KHONOA KE SA NTLO EA HAE"**.

KA LEBAKA LENA KE IPELETSA HO LEFAPHA LA LIPHUPUTSO TLAS'A LEKALA LA TEMO HO FATA MAKOATSI, LE RE BATLELE MEKHOA EA MORAO-RAO EA HO HLAHISA LIJO, E TLA RE PHELISA LE MAEMONG ANA.

HAEBA LEFAPHA LEO LA LIPHUPUTSO LE KA SITO A HO PHETHA MOSEBETSI ONA, KE BELAELA HORE KAROLO E KHOLO EA SECHABA SA BASOTHO E TLA SHOELLA KA TLUNG KE TLALA.

SECHABA SA HESO,

RE FIHLA NAKONG ENA EA MAFELO A SELEMO E LE HA RE QETA HO TS'OE A LETSATSI LA LEFATS'E LA LEFU LA AIDS (**WORLD AIDS DAY**) KA LA PELE TS'ITOE (**1 TS'ITOE**).

LETSATSING LEO, RE ILE RA BOELA RA NCHAFATSA BOITLAMO BA NAHA EA LESOTHO BA HORE SELEMO SA 2030 SE TLA FIHLA LEFU LENA LA AIDS LE FELILE, E SE E LE PALE EA MAOBANE.

EMPA LE HA HO LE JOALO, LITLALEHO LE LIPHUPUTSO TSA MORAO-RAO LI EA RE BONTS'A HORE TSELA EA RONA E SA LE TELELE PHETHAHATSONG EA BOITLAMO BONA BA RONA.

TLAS'A BOITHUTO BO ENTSOENG KA TS'EHETSO LE LITHUSO TSA MOKHATLO OA AMERIKA O LOANTS'ANG LEFU LA AIDS (**PEPFAR**), BO BITSOANG **LePHIA**, HO HLAHELLETSE HORE TS'OAETSO TSE NCHA LI NTSE LI ETSAHALA KA SEKHAHLA SE SEHOLO.

BATHO BA KABANG LIKETE TSE LESHOME LE METSO E MERARO (**13 000**) BA LIPAKENG TSA LILEMO TSE LESHOME LE METSO E MEHLANO HO ISA HO BA LILEMO TSE MASHOME A MAHLANO A METSO E ROBONG (**15-59 YEARS OF AGE**) BA TS'OAETSOA BOCHA SELEMO LE SELEMO.

KEA KHOLOA LEA HLOKOMELA HORE KAROLO ENA EA SECHABA KE EONA E JERENG, KA KOTLOLOHO, TLHAHISO LE BOSEBELETSI MORUONG OA NAHA.

KA HOO RE HLOKA HO ETSA SOHLE SEO RE KA SE FIHLELANG HO BONA HORE
LITS'OAETSO TSE NCHA LIA FELA.

KE KOPA HO IPILE TSA, JOALOKA MAOBA LE MAOBANE, HORE RE FETOLENG
BOITS'OARO BA RONA RE LE SECHABA SA BASOTHO E LE HORE RE TLE RE TSEBE
HO FETOLA BOEMO BONA BO HLOBAETSANG.

SECHABA SA HESO,

HA KE QALA MOLAETSA ONA OA KA, KE ILE KA LE HOPOTSA HORE TSELA EO RE E
TSAMAILENG SELEMONG SENA SE FELANG E BILE TSELA E SENG BONOLO.

KE SEBELISITSE MANTSOE ANA HOBANE, RURI, RE LE SECHABA, SELEMONG SENA
SE FELANG, RE BONE LIKETSAHALO TSE NYAROSANG, TSE TLONTLOLLANG, 'ME
TSA BA TSA RE HLAHISA HAMPE MAHLONG A BALICHABA.

HA KE LAKATSE HO LOKOLISA LIKETSAHALO TSENA, EMPA HA KE LI HOPOLA, KE
UTLOA KE NTSE KE TLAMEHA HO LE HOPOTSA HORE METHEO EA SECHABA SENA
SA MOSHOESHOE KE KHOTSO, TS'OARELANO, LE POELANO.

HA RE HOPOLENG POLELO EA BOHLOKOA, EO RE E TSEBANG, E RENG "O KA NKETSANG HA E AHE MOTSE, MOTSE HO AHOA OA MORAPELI THESELE".

LIPOLAEANO, LINTOA LE LIKHANG TSE SA EENG MORITING LI KEKE TSA RE TLISETSA KHOTSO LE BOTSITSO, KAPA NTLAFATSO EA MORUO.

HA RE KENA SELEMONG SE SECHA, HA RE NKENG KANO E NCHA MME RE KOPE 'MOPI OA RONA HO RE ETELLA PELE LE HO RE SEBELISA HO BA BAHLANKA LE BASEBELETSI BA KHOTSO, KA MEHLA RE BATLE HO TS'OARELA BA RE SITETSOENG LE HO TS'ELISA BA HLABILOENG LIPELO.

HA RE KENYENG LIPELONG LE LIKELELLONG TSA RONA MANTSOE A TAO A TSOANG BUKENG EA LIBUKA MOO MOPROFETA ESAIA A RENG:

"BATLANG JEHOVA HA A SA FUMANOA, LE MO RAPELE HA A SA LE HAUFI. MOLOTSANA A FURALLE TSELA EA HAE, EA KHOPO A TLOHELE MEHOPOLO EA HAE, A SOKOLOHELE HO JEHOVA....." (ESAIA 55, 6-7).

KE TUMELO EA KA E TIILENG HORE HA RE KA IKOAHLAHA KA TIEO KA PEL'A 'MOPI
OA RONA, 'ME RA BATLA SEFAHLEHO SA HAE, SELEMO SENA SE SECHA SE KA RE
BEHELA LITHOLOANA TSE HLABOSEHANG.

.

BASOTHO BA HESO, SECHABA SA THESELE, NTUMELLENG KE QETELLE POLELO
ENA EA KA KA HO LE LAKALETSA MAFELO A SELEMO A MATLE, LE MAHLOHONOLO,
THABO LE KHOTSO SELEMONG SE SECHA SA LIKETE TSE PELI, LESHOME LE METSO
E ROBELI (2018).

.

MOLIMO O BOLOKE LESOTHO LE BASOTHO.

.

KHOTSO. PULA. NALA.

.

.

.

.

.

.

